



TAPAK 9

Vijay Mallya London nung pua lir



TAPAK 10

Britain PM Theresa May-i election tekaraba nung aginer

VOL. XIV NO. 179 (ADOK 179)

DIMAPUR

WEDNESDAY

APRIL 19, 2017

5.00

Centre-i NSCN-R aser NSCN-NK den ceasefire atsülanger

Dimapur, April 18 (Agencies): Mongulbarnü India sorkari Nagaland nung telungpur telok ana den Suspension of Operation mapang atsülangtsü telemtetba agi.

Telok anaji National Socialist Council of Nagaland-Reformation (NSCN/R) aser National Socialist Council of Nagaland- Neokpao- Khitovi (NSCN/NK) lir.

India sorkari NSCN/R aser NSCN/NK den Ceasefire tenangzüktep agia lir.

April 28, 2017 nungi tenzuka India sorkari NSCN/R aser NSCN/NK teloktem den küm ka atema Suspension of Operation atsülangtsü telemtetba agi.

Iba tenangzüktep ya India sorkar tenung nung Ministry of Home Affairs Joint Secretary, Satyendra Garg-i NSCN/R tenung nung Toshi Longkumer aser Imlongnukshi Chang aser NSCN/NK tenung nung GPRN/ NSCN Supervisor, Jack Jimomun nung den agia liasü.

Manipur NH 37 nung telungpurtemi garitem amak

Imphal, Apr 18 (Agencies): Manipur kübok Kangpokpi district nung Mongulbarne Kuki nung ta temulung melemi bilemba telungpur kari totzü abenba garitem dak injang khaloktsü, ta police-i metetdaksü.

National Highway No. 37 nung tanep 5:45 ako meta Assam nungi Imphal leni aruba truck aser totzü abenba garitem dak injang khaloktsü. Idangji garitem meinba CRPF sepaitemi meyiper telungpur dak injang khaloktsü, ta police-isa ashi.

Iba mapang petrol aser diesel abenba gari ana dak injang agi khashi saka tia ka garitem nung mi aploka mapok. Osang angazükli police unit tem tesem tonga ao.

"Totzü abenba garitem apok asübo timtem tulu ajurula. Onoki iba inyakym kukua aitsür." ta iba tesem nung alir T. Kipgen-i osangbener dang ashi.

"CRPF jeep gari ishikati

meinba ajanga Highway nung gari 600 dak tema kümzuka meyutettsü. Sorkari national highway ana nung Indian Reserve Battalion (IRB) aser police commando tem mapa lemzüksütsü ta asüba onoki pelaa agizük" ta driver Laishram Chinglien-ia osangbener dang ashi.

"Ajisüaka, All Naga Students' Association Manipur (ANSAM)-i sepaitem lemzüksütsü tebilemba anema nokdak aser sorkar parnok dang kecha meshiteter aser mapa kecha meinyaker" ta paisa shisem.

Tesüba mapangtem nunga police commandos aser IRB personnel tem Ukhrul aser tanga lisopurtem aliba district nungi anienogo. Sorkari highways anüktsü atema mapa lemzüksütsü tebilembaji sota lir, ta ketdangser kati osangbener dang ashi.

(Maneni tapak 12 nung...)

NSCN aser GOI tsüngda Cease-fire Review Committee senden amen

Dimapur, April 18 (TYO): April 17, 2017 nü New Delhi nung National Socialist Council of Nagalim (NSCN) aser Government of India (GOI) tsüngda Cease-fire Review Committee senden amen, ta MIP, Hebron sangdong ka nung metetdaksü.

Senden nung onük aika benoka olemtep aser ajaki mulunga telemtetbatem agi, ta sangdong nungsa shia lir.

Senden nung mendenji Rina Mitra, Special Secretary (Internal Security) liasü aser GOI tenung nung Satyendra Garg, Joint Secretary (Home) Northeast In-charge, A. Radha Rani, Deputy Secretary (NE.III), Gurbachan Singh, Additional Director (IB), A.K. Mishra, senior Joint Director (IB), Northeast In-charge, D.K

Pathak, Chairman CFMG, Maj. Gen. Sanjay Gupta, IGAR (North), Brig. D.S. Rana, DGMO, Col. Amit Tewati, DGMI, Maj. P. Lokchandar, DGMO, S.C. Sahoo aser Jyoti Kailash, Principal Resident Commissioner, Nagaland House, New Delhi nungertem aden.

NSCN telokji Lt. Gen. (Retd) V.S Atem, Collective Leadership Member lenisüba kübok committee züngsemtem Vikiye Awomi, Convener CFMC, Tongmeth Wangnao, Collective Leadership Member, Angaikham Makunga, SEM, K. Chawang, SEM, V. Horam, Kilonser MIP, John Anal, Secretary to Vice President, GPRN, D.J. Rudolph, Secretary CFMC aser Brig. H. Shadang, GHQ Naga Army nungertem aden, ta MIP, Hebron sangdong nungsa metetdaksü.

ABAM Clean Election zone 3 buba sentong agi



Dimapur, April 18 (TYO): ABAM Social Concern ketdangsuba nung maneni Clean Election sentong Yimten Yimsüsür, Town Committee aser Arogo asoshi Zone 3 buba Aitlenden Baptist Arogo nung April 18, 2017 nü agiogo.

Iba sentong nung Langpangkong, Changkikong aser Japukong Ao arogo 20 nungi nisung 165 shi arua dena liasü.

Sentong nung shisalen sayurji FAC Mokochung nung Asso. Prof. Dr. Aotemshi aser Literature and Education Secretary, ABAM, Apok Jamir na liasü, ta Executive Secretary, ABAM ajanga sangdong nung metetdaksü.

Asen lima election ajanga teraksa adokba tebilemstü nung ajemdaker election merükteta agia aotsü asoshi Democracy koba ajanga nisung shia nem pei temeden jembitsü, inyaksü aser amangtsü latetja lir, iba ya asen nübori mamshiteti ozüing alema inyakra, nisung kati dang asen

lima nung yimsüsüsü mesüra tamangba yimsü ka ajanga yimsüsüba arua asen tamanger jenjang anakshitsüsü ana nung lir, ta shisalen sayurtemi ashi.

Tanü asenok alima shirangba ya asen nübori Indian temzüing ozüing kübok mesüi ozüing alema aliba ajanga lir aser temzüing koba lateta lir aji nübortemi jangja memetetba ajanga tai jia shitak, shitakja shidak ta inyakba ajanga nübor makmakshishir. Anungji nisung ajaki Indian temzüing jangja metettsü tim, ta parnokisa ashi.

Asenoki sen yong vote agütsüba, proxy vote asüba aser yimer nem vote masüba ajanga senso nungi jentokba mapa asoshi tepuokdaki aotsü Indian temzüing nung lir, anungji nisung shia itemji meteta pei temeden mapa asoshi ola adoktsü mapang tongogo.

Ano Senso Candidate shimba ya intoktsü mapang tongogo, kechiaser iba ya ajanga ochi samaa aoer aser ya khenyongi


merumeru jakla jungkai adokba mapa. Anungji tanü asen mapang nungbo pei ajung asaa inyakbaya samadaksüdi, ta tenati tesenteper ayongzuka jembi.

Shisalen sayurtemisa ashiba agi, candidate shimba tsüsü candidate jagi pei sasa, pei anishitetba aser azüoktetba taküm asüsüla, kechiaser pei sasa pei manishitetba aser mazüoktetba taküm jagi lokti asoshi takok ngua meinyaksü. Anungji nübortemi lenir shimdang kanga kümdanga shimtsüla.

Talisa, asen tamanger ka asoshi election ya tanelar tongpang ka lir, anungji nisung shia Tsüngrem dang asüngdanga Pai molungba lenir shimtsü asoshi rongsen aser mapa yong pei kibong rangben taküm kuli mezüingmeshi mesüdaksüi ochi lenir adokdakjang ta sarasadema lenir shimtsüla, ta shisalen sayurtemi ashi.

(Maneni tapak 12 nung...)

NAAC Peer Team-i KSC, Jotsoma semdangogo



Dimapur, April 18 (TYO): UGC-National Assessment & Accreditation Council Peer Team-i April 11-12, 2017 nung Kohima Science College, Jotsoma semdanga 2 buba cycle assessment agiogo.

Peer Team nung Chairperson ji taoba Pro VC, Ranchi University, Jharkhand Prof Mohammad Raziuddin liasü, aser züngsemtemji School of Life Sciences Prof K.N. Guruprasad, Viswa Vidhyalaya, Indore, taoba Principal, Khallikote College

(Autonomous), Odisha Dr Gourang Chandra Mohanty aser Madhya Pradesh Devi Ahilaya (Member Co-ordinator) nungertem liasü.

Parnoki anogo ananü amungdang college-i Self Study Report nung zülua aliba ama facility balala semdanga liasü, ta KSC NAAC Steering Committee Coordinator, Dr Sanjay Sharma-i sangdong ka nung ashi.

NAAC Peer Team-i college Principal, IQAC züngsemtem, tesayurtem, staff aser

kaketshirtem den ajurutebpa sülen Higher Education department ketdangsertem, Governing Body, Nagaland University representatives, Alumni Association, aser Parents-Teacher Association dena ajuruteb, ta Dr Sanjay Sharma-isa sangdong nung ashi.

Parnoki Exit Meeting ka agia semdanga tembang aser idangji Principal nem parnok indang confidential report agütsü, ta paisa shisem.

Mon aser Zunheboto na nung Induction training agi

Dimapur, April 18 (TYO) : April 18, 2017 nü District Executive Hall, DC office Mon nung State Sorkar mapa inyaker tasenpur, group B & C atema tanabuba induction training sentong agiogo.

ITP nung Dy. Director (Training) & Nodal Officer, Er. N. Moa Longkumer-i iba training sentong indang temetetsütem rasaa ashi.

Pai, sorkar mapa inyaksü asoshi shimtetertemji parnok

nem lemzüksüba mapa takok ngua inyaksü asoshi sorkari sen dalang agütsür, anungji asenoki asen mapa meteta ochi agi bendanga agüja inyaksü tim, ta ashi.

Iba sentong nung Mon Deputy Commissioner, W. Honje Konyak tetushi tejaoker liasü aser Mon SDO Civil Ilika Zhimomi menden asü.

Iba sentong ya Administrative Training Institute Nagaland: Kohima-i District

Administration, Mon den lokteper ayong aser training ya April 28, 2017 nü tembangsü.

Ano Zunheboto nunga sorkar mapa inyaker tasen Group 'B' & 'C' pur tem atema induction training sentong agiogo.

Iba sentong asoshi sen teyari DoPT, Government of India (GOI)-i agütsü aser ATI, Kohima-i ayonga agi.

Iba sentong Zunheboto Hq nung ADC, Nungsangmenla Imchen tetushi tejaoker süa

lapoktsü. Lai, tan training nung angazükbaji mapa nung kanga nüngdaksü, ta ashi.

Training nung mapang amshiba aser lenisütsü den ano tanga tongtibang onük aika nung ajemdaker tesayuba agütsü. Iba sentong nung Zunheboto SDO (C), Holohon Yepthomi menden liasü aser Zunheboto district ITP nung Programme Coordinator Dr. Alem W. Longchar ITP sentong ondang temetetsü kar lemsatöp.

L. Hotovi yim Baptist Arogo Hon Jubilee amungtsü

Dimapur, April 18 (TYO) : L. Hotovi yim Baptist Arogo April 20, 2017 nü Tenla Kidang Hon Jubilee amungtsü sentong ajak renema lir.

Iba sentong nung tongti o jembir, WSBK nung Executive Secretary, Rev. Dr. Hevukhu Achumi-i "Proclamation of Liberation" onük nung ajemdaker o jembitsü.

Sentong nung LHGBA Pastor, Lujeto Yeptho menden asütsü aser yimtak Head G.B. Hotovi Yepthomi-i tarurtem pela agizükba o jembitsü.

Iba dak alaka ano tanga sentongtemji Jubilee lapokba, nüngo sayaba, sobaliba ken aser ken balala atenbatem alitsü.

L. Hotovi yim Baptist Arogo nung Pastor aser Jubilee organising committee ajanga Arogo züngsemtem, tekjaokertem aser temeimertem ajak shia aliba anogo nung anepdang 10:00 ako nungi iba Hon Jubilee nung arua adentsü ayongzüker.

Mon DPDB senden menogo

Dimapur, April 18 (TYO) : Mon District Planning & Development Board (DPDB) senden, Mon Deputy Commissioner, W. Honje Konyak menden sür April 17, 2017 nü DC indang conference hall nung menogo.

Senden tenzüka Deputy Commissioner, W. Honje Konyak-i senden nung adeni arurtem pela agizük aser iba sülen DPDB züngsemtem pei sasa metetpelaba mapang agi. Iba sülen taoba mapang senden nung lemteta ayuba aser jembibatem khen azüng.

W. Honje Konyak-i tarurtem pela agizükba mapang Aoleang benjong mapang District-i Nalaland Chief Minister arudang züngsemtemi amalitepa yaritepba asoshi pelaba metetdaksü.

Mon SDO Civil, Ilika Zhimomi-i züngsemtem dang District nungi sorkar mapa nung tasen shimokertem asoshi ATI Kohima nung 2buba Induction Training Programme agitsü indang rasaa ashi.

Lai, April 18, 2017 nü nungi tenzüka anogo 10 nü agitsü aliba training sentong asoshi department balala nungi sorkar mapa inyaker 35-i tenüng agütsüogo, ta ashi.

Senden nung Chingkhao Compound School dang Chingkhao Lampong School ta ajatsü asoshi board-i telmelaba agütsü aser Food & Civil Supplies department dang taruba senden nung parnoki inyaktetba arua sayutsü tetuyuba agütsü.

JOKO MAPANG TATEMBANG TONGGA ARUDAR... GST RENEMA YUANG



Central Exise mesüra Service Tax agütsür ajak yimlibilema tangsa tang GST nung tenüng agüjang

Na GST Portal (www.gst.gov.in) nung tenüng inoka mayu tashi tang aliba temzüng ozüing kübok Duty/Tax tangutsütem GST nung bendena meytetsü

Na tenüng inoktsü asoshi ACES Portal ajanga Provisional ID aser Password agütsütsü. Na duty/tax nungi angutsü aliba nung takoksa malunera TANGSA TANG GST Portal nung tenüng inokang.

Na ano tenüng magütsü lira, tangutsü tim asoshi file masü tsüngda GST Portal nung tama tenüng inoktsü nüngdak. Nai mapang shitak nung tenüng agütsüba ajanga nü shishilemba mapa tsütsü GST mapatem melamelar asütsü.

Na GST Portal nung tenüng agütsür lir, Portal (www.gst.gov.in) nung agütsür aliba nü user name ACES nung inoker nü tax file asüba mapa tenzükan.

Nai GST-i mebelenüra ACES nung ibaji metetdakjang aser nü tax file süang. Nü provisional ID aser password naji thitsütsü aser ibaji ajanga na tangutsütem GST dangi arutsü aliba nokdangtsü akok.

A nation is made, when hearts are paid.



Commissioner, Central Board of Excise & Customs
CENTRAL BOARD OF EXCISE & CUSTOMS
www.cbec.gov.in





Guwahati, April 18, 2017 : Mongulbarnü North East tesem nung Information & Broadcasting Ministry indang inyakyimtem, sentongtem aser mapa tasen awawa inyakbatem asadanga sentong temer külen Union Minister for Urban Development, Housing & Urban Poverty Alleviation aser Information & Broadcasting M Venkaiah Naidu-i osangbenertem den senden mena jembiba noksa nung angur.

Police-i Polytechnic kaketshirtem nokdang

Agartala, April 18 (Agencies): Tripura Women's Polytechnic Institute nungi kaketshirtemi tanü ashiba agi, parnok classmate Anawara Choudhury tepset ta temolung melemi bilemba ken o nung parnoki anema nokdakba nokdangtsü asoshi state sorkari police yok. Iba ken o nung temolung melemi bilemer rongnung local CPI(M) lenir aser Anawara tebu tanobo tongti lir.

Agartala nung yashi 'educational institution' balala nungi kaketshirtem-i Anawara Choudhury tepsetba ken o nung temeden meshia 'candle march' ka ayongzüksü asoshi merang, saka additional SP Sharmishta Chakraborty-i anir police lokti kati parnok nokdanga liasü.

Iba ya madalokdang police ketdangsertem kar 'women's polytechnic'-i oa parnoki iba mapa manenra parnok career raksatsütsü ta amokmere aser institution nung ketdangsertem danga kaketshirtem azüoktsü asoshi

tetuyuba agüja liasü. Maneni police temi Bordwali higher secondary school nung azünger kaketshirtema amokmerena liasü.

Arishi küm 19 tain Anawara Chowdhury April 12 nü süa liasü. La tebu Mohammed Abdulla Amin-i ashiba agi, April 10 nü la tepok nung tashitsü maremteti atuba ajanga Agartala Govt Medical College (AGMC)-i anir ao. Iba sülen idakji aliba doctor-i 'ultrasonography' agitsü asoshi tetuyuba agütsü, saka Anawara yamaji tashitsü atua liaka doctor mesüra lab technician shinga maru aser la aonung 12:00 ako shi nung asü.

La asüba sülen post-graduate medical kaketshirtem arua Anawara temolungjang mapa meinyaki asü ta 'certificate' agütsü. Lar kiyongertemi temolung melemi ashiba agi, la kar-i tepset mesüra mozü kecha magütsüi südaktsütsü asoshi tasa liasü.

Iba dak sendakba ken o

nung temolung melemi bilemba aika lir, item rongnung tebutanobo ka lir kechiyong pai Anawara'er kibong dang iba ken o toktsütsü asoshi amokmerenba Amin-i metetdaksü.

Amin-i iba ken o Chief Minister Manik Sarkar aser DGPA K Sukla nem anogo ana tejakdang metetdakja liasü.

Anawara asüba ken o nung AGMC doctor temi post mortem report yanglushitsü asoshi kanga merangdangdar ta kaketshirtemi ashi.

Amin-i ashiba agi, par kiyongertemi agütsüba osang ajanga la tepsetba jangjar, kechiyong parnoki ashiba agi, Anawara dak teti züka liasü aser la masü tsüingda hopta 3 dak tali chiyongtsü kecha magütsüi lumia doktsü.

Iba ken o bushisüingdangtsü atema nisung 3 agi akümba telok ka dentetogo. Parnoki Anawara anepaluba ren nung doctor temi parnok mapa shitak inyak meinyak ibaji asadangtsü.

Tripura BJP tekolakba anema Opposition teloki longkak ait

Agartala, April 18 (Agencies): Tripura nung BJP tekolakba, Biprab Deb-i Electronic Voting Machine (EVM) indang olen ka ashiba anema state nung yimten yimsüsür kinük ajunga nungi ola adok.

"State BJP tekolakbai April 12 nü Teliamura nung nüburtem den senden ka aliba mapang, Uttar Pradesh aser Uttarakhand nung ama Tripura nung taruba sorkarji BJP-i akümtsü. Koba telok nungi vote agütsüdir agüjaka vote ji BJP candidate tem dangi aotsü. Manik Sarkar indang vote jia BJP dangi aotsü, ta ashi," ta CPI(M) secretary, Bijan Dhar-i osangbener dang ashi.

Deb-i iba ama o jembiba

ajanga EVM meshidaki amshiba sayur aser pa nem tapet temerenshi agütsütsüla, ta takhangba agüja CPI(M) teloki state tesem balala nung Hombarnü longkak aita jaja.

Vote agütsürtemi candidate shidak nem vote agütsüba jangjatsü asoshi EVM nung 'Voter-Verifiable Paper Audit Trail' (VVPAT) inoka amshitsü asoshi longkak aitertemi takhangba agütsü.

Mayawati-i Supreme Court nung ken o benoka aliba ama Deb-i ashi, ta Trinamool Pradesh Congress Committee (TPCC) telokia aija longkak ait.

"EVM nung party ka nem dang vote agütsütetsüsa yanglutsü akoker ta ashiba kuli sayutsü asoshi Election

Commission (EC) ajanga jaoka aliba mapang Deb-i o mekümdangi jembiba," ta Trinamool telok tir, Ashis Shah-i ashi.

"EVM ajanga ashioktsütsü akoker ta Deb o nung angateter. EC ajanga 'Paper trail' amshitsü asoshi Congress telok nung lenir tejen, P Chidambaram-ia Supreme Court nung ken o benoka lir," ta Tripura nung Congress tir, Birajit Sinha-ia ashi.

"Ni nüburtem dang shinüba o ya parnoki junga mangatet. Ni shinübaji, tangbo nüburtem timbai BJP sapur, anungji nisung ajungai iba telok nem vote agütsütsü aser Manik Sarkar-ia pa temolung melener BJP nem vote agütsütsü," ta Tripura BJP tekolakbai jangjashitsü.

Nisung tepsetba ken o nung temolung melemi aliba ana apu

Silchar, April 18 (Agencies): Haflong nung aliba 43 Assam Rifle temi Mirdul Das aser Pritwiraj Daaolagupu na Gunjung

tesem nung apu. Tena ket nungi pistol ka aser injang tazüing asem ngutet.

2012 küm Swapan Kanti

Dhar Choudhury tepsetba ken o nung tena densema liasü saka bail nung chiok. Tena ya NSCN-(IM) den sendaktepa lir, ta police-i ashi.

DD Channel 'Arun Prabha' August nung amenloktsü

April 18, 2017 : Northeast India ajungketsü nükjidong nung Prasar Bharati-i satellite television channel tasen ka; Arun Prabha amenloktsü renemogo, ta Mongulbarnü Assam Chief Minister Sarbananda Sonowal-i metetdaksü.

"Information & Broadcasting ministry ajanga Northeast nung sobaliba maparen den külemi tatalokba balalatem nung nüburtemi temolung agüja jangradaktsütsü nükjidong nung iba channel amenloktsü asoshi benok," ta Sonowal-i ashi.

Itanagar nung office amenloker 'Arun Prabha' 2017 August ita nungi mapa inyak tenzüksü, ta paisa ashi.

'Arun Prabha' ya iba tesem nung Doordarshan indang channel tanabuba asütsü. DD Arun Prabha channel amenloktsüba ya Narendra Modi-i aniba sorkari mezüngbuba budget benokba mapang nung sangdonga liasü. Sonowal-i ano Union sorkar dang Assam atemaa channel ka amenloktsütsü asoshi mepishi.

Taoba September ita Doordarshan-i moapu nung amungba kenten benjongmung; Ziro festival atema dena inyaka liasü. Iba benjongmung ya local cultural organization, Arunachal Pradesh tourism Department aser Ministry of Development of Northeast region (DoNER)-i achaayanga amunger.

Centre-i Manipur nung DM University lapoktsü temelaba agütsü

Imphal, April 18 (Agencies): Manipur nung kaket shisatsü bushiba ren nung tali ajungkettsü nükjidong nung union sorkari DM College university jenjangi ajungkettsü asoshi temelaba agütsüogo.

Aji süaka iba bill Manipur legislative assembly nung benoka agizüksü asoshi anünga lir.

Iba terenlok osang state Education minister Th Radheshyam-i agütsü. Pa Delhi nung mobile app 'Fund and Reform Tracker' amenlokba sentong nung dena liasü. Iba app ya Rashtriya Uchchar

Siksha Abhiyan (RSA)-i inyakba mapatem asadangtsü nükjidong nung amenlok.

Iba mobile app ya Union Human Resources Development Minister Prakash Javadekar-i amenlokjaa liasü.

Radheshyam maneni ashiba agi, pa Union HRD Minister den ajurutepa liasü, shibai DM college university jenjangi ajungkettsü asoshi molungba osang agütsü. Pai maneni Prakash Javadekar dang state nung higher education infrastructure jungkettsü asoshi senotsü tenüngdakbatem agütsütsü asoshi mepishi.

Gauhati University nung 'regional language' pezü indang PG course agütsütsü

Guwahati, April 18 (Agencies): Oshi-oben nung mapang inyakba jajaba mapang teyari tulu agütsütsü. Aser iba jenjang nung ajungkettsü nükjidong nung Gauhati University (GU) ajanga Assamese, Odia, Tamil aser Nepali oshi nung Post Graduate (PG) course agütsütsü.

"State nung lanurtemi arrtsü alema oa pei tejangraba mapa inyaksü asoshi bushiba nung item oshi pezü agütsüba ajanga teyari tulu agütsütsü imlar," ta GU ketdangsertemi ashi.

Item oshi pezü nung PG course agitsü asoshi admission ya April 18 nungi tenzüksü aser May ita mezüng hopta nungi class tenzüksü.

Item oshi pezü ya PG course agütsütsü asoshi University ajanga nungdakba 'resources' tem bushisüindanger shimtet aser taruba küm nungi ano tanga oshitem inoksemtsü nükjidong lir.

"Regional oshitem indang tesayuba agütsüba ajanga oshi-oben mangatettepba samatsütsü asoshi teyari tulu agütsütsü aser mapa

inyakertem tesem melenshia mapang inyakba jajaba mapang teyari tulu agütsütsü. Aser iba jenjang nung ajungkettsü nükjidong nung Gauhati University (GU) ajanga Assamese, Odia, Tamil aser Nepali oshi nung Post Graduate (PG) course agütsütsü.

Item course ya 'discipline' mashi nung graduate sür alirtemi agitetsü saka iba course agitsü asoshi tesayuba oshi ya pei tetsü oshi masütsüla.

Assam nung aliba nüburtem den jembishinütsü asoshi Private sector balala nung mapa inyaker lanurtemi Assam oshi angazüksü kanga jangrar, ta University osang ka ajanga ashi.

"Tanü asüing kaket reju, private company aser 'public sector undertaking' company tem nung inyakeritemi local aser regional oshi angatetsü kanga nungdaka kümogo. Aser regional oshitem angazüksü jangrar ya anogoshia timba akümer," ta osang ajangasa ashi.



TIR YIMYIM

YIMOBILEM (EDITORIAL)

DIMAPUR WEDNESDAY, APRIL 19, 2017

Aluyimertem ajungshitsüla

Nisunger tashitemetet agi anüing petinu nung tua aliyonga chibo chi chiyonga alitsü, anungji nisung ajak peria ali nungi chiyongtsü züsentettsübaji nisung ajak asoshi temulung agüja inyaktsüba mapa ka asütsü. Tanü rongsen bushiba lima nung nisungtemi sen dang bushira saka shingaia alu mayim ajaki sen dang bushira sen ki sünga yur aya agi asütsü. Iba nungdakji meteta takokeribo alu tulu ayimtsüla aser alu tulu ayimtsü makokertemi pei peribosa züsentettsüsa alu tilalabo ayimtsü ajungshiteptsüla. Aji oda, alima nung alirtem asoshi chiyongtsü züsentettsü atema alu ayimtsü kanga nungdakba agi government kübok aluyimba tapu balala repranga yariteptsü atema department aika lapoka lir. Item department-tem jagi aluyimertem nem alu tajungba ayimtsü asoshi tesayuba agütsütsü aser government-ia lenmang tapu balala nung yaritsü asoshi küm shia sentong yanglur. Ano, aluyimertem tajangzük ngudaktsütsü asoshi mapang mapang shia government-i alima tesem balala nungi pei pei lu nung züsentetba chiyongtsü ayoktsü aser tangar danga alitsü asoshi sentong yanglur. Iba ama sentong mapang aluyimertem rongnung alu tajungba ayimtsü asoshi shisalemsateper aser alu nung züsentetba chiyongtsü ayoktsü aser alitsüba lenmang angur. Talisa, Nagaland ama tangar aluyimertem dak dang nendaka aliba state aser nübortem asoshi aluyimtsü tasa tajungba sayutsü aser aluyimtsü jangradaktsütsübaji kanga tongtibang lir. Atangji, meranga inyaktsüla saka alu ayimtsüba mapa ya tanü putu nungbo kanga tasakbo masü. Akhidangbo, anü agi pua tsünglu agi ajaa alu inyak, aser iba jagia tebok masüng. Ajisüaka, tanübo temang raksa masü saka mapang meteta aser aluyimba hadir aser gari dena amshia alu ayimer. Aji oda, lenden tashi nung tsük lu ayimtsü aser tekong tashi nung süngjang lu, aonsutsü lu, süngo lu aser ano alu tapu aika yima otettsü. Iba nükla nung government-i aluyimba nung temulung kanga agütsütsü mapang tongogo. Tangbo, aluyimba tsütsü Nagaland nunga department aika liaka department-temi aluyimertem yaria alu ayimba aser alu nung züsentetbatem tangaleni yoktsüsa lenmang sayuba mangur. Mapang kabo Dimapur nung tanga state nungia government aser private company-tem jaoka Agri Expo sentong ayongzükasa lia aruogo. Ajisüaka, tanübo Nagaland nung Agri Expo ama aser Road show ama aliba mangur. Item ama sentong ayongzüka akabaji aluyimertem asoshi kanga tajangzük liasü. Iba ama mapang nung alu junga ayimtsü asoshi shisatsü aika angazüker aser ano pei lu nung züsentetba chiyongtsüa tangari chidanger aser joko teti atema talirtem dena lenmang lapoka ayur. Asen government nung aluyimtsü sentong aser sen aliyonga mapa küma meinyaktetbaji asenoki alu shitakba yima asen lima takar akümstsü meranger masü saka aluyimba aser aluyimertem tenung nung sen agizüka achitsü dang bilemer aser yamaji inyaker. Tangbo joko iba shisatsüji melentsüla aser asen lima nung züsentetba agi India nung dang masü saka alima ajunga sapua achitsüsa asenoki alu ayim tenzüktsüla. Asen lima nungbo aluyimer tetezü sensaker saka iba tetezüjia dena melener aluyimertem ajak pei lu nung züsentetba ayokba agi takar akümstsüsa aluyimba nung temelenshi tulu adoktsü kanga nungdaka kümogo. Item ajakji tanü lanurtemi melamelaa inyaktettsü. Aji oda, asen lima ya aluyimba lima ka akümstsü asoshi lanurtem dang alu ayimtsü nungdakba indang angatetdaktsütsü aser aluyimba ajanga tajangzük angutsüba lenmangtem sayutsü. Idangjibo, aluyimertem ki tajungba aser gari tajungba asütsü. Idangjibo aluyimertemiang arogo, lokti aser yimten nem tenla tuluba agütsütsü. Idangjibo asenok talir masü tayoker asütsü. Iba mangdang ataloktsü asoshi government-i Naga nungertem nem aluyimtsü tasa aser teyari shitak agütsütettsüla.

OLEMSABANG

Senso nungi Jendokba teshisadangtsü

Tawa Ao Senden-i ka ken, ka ken ta Aoer senso nungi nübo balala jendokba osang angashidang, kanga shisabolua aser tarutsü mapangtem nung Aoer libalirua aotsü asoshi kanga tsübuseta bilemer. Iba teinyakba ajanga tip atem benur arutsü melena tasüngdangba dang aika adokdaktsüogo. Ao Senden ya Ao kin tsüngda amalitep tajung akatsü aser Naga nunger tanga kintem dena tangatettep tajung katettsü nükjidong yur tentetba lokti ka lir. Ao kin Chungliyimti nungi tenzüka putusa putu sobaliba aser yimsüsüba koba ochi, temeten aser Aoer den tapet lokti achayangba dak ajemdaker amshia aru, ibaji, kija kar miim nükjidong ataloktsü asoshi memenentsütsüla. Anungji mapang balala nung Ao Senden telemtetbatem item sobaliba tajung dak ajemdaker agia aru. Saka tawa tanü Ao Senden inyakyim ajanga reprangtetba agi, iba lokti inyakyim ya tanü India nunger temzüng kübok aliba yimsüsüba inyakyim den aiben tsükteper.

Tetsü tebou mapang nungi Aoer yim kaji tangar dak memetaloki aliba yimtsüng yimli (sovereign village nation) ka ama inyaksangshia aruogo. Yimtsüng kübok alir sensotemi yimten tashi angatsüla aser yimten inyakyim Putu Menden-i sensotem nem angatetdaktsütsüla. Iba Aoer yimtem Putu Menden/ Samen Menchen ya Unger mesüra Tsünger-i achayanga aruer aser iba ama yimsüsübaren ya India temzüng (constitution) ajanga-a mela-a lir. Tai inyaker senso ka dak pa tai alang merenshitsü Putu Menden dak tashi lir. Item nisungtem merenshitsü asoshi kinunger mesura kidong nungi kuli ja-a merenshia aruer. Item temerenshitemji senchi, Putu mesüra iba dak sendakba mapa nungi anentsütsü, tsü-ali agientsü, nübo agi merenshitsü aser kangasa tamajung tatalokba nung züka merenshitsü, yamalasa inyaka aru. Nisung ka senso nungi jendoktsüba temerenshi yabo Aoer sobaliba-a aruba mapang tepiyong nung tang tashi züngteta dang ataloka lir. Ao Senden ya Aoer rongnung aser tangar Naga kin den telungjem aser tesendaktep tajung alitsü nukjidong nung mapa inyaktsü tongtipangba ta bilemer aser yamaji pei arok sensor ka züngsem (identity) temeden agientsüji Ao Senden temzüng nunga mali ta nibo bilemer.

Ao Senden-i Aoer senso kar Aoer nungi jendokaka, iba ya mapa küma benshia aotsü asoshi timtem aika ajurutsü amai reprangteter. Ao Senden-i sensotem aridokba osang den kulemi jenjangtem (terms and conditions) tejangja metetdaktsü nung tajungba süla. Yimtsüng ka indang Putu Mendeni par senso ka jendoker asünungbo timtem tuluka melila. Yabo sobaliba temzüng (Customary law) dak aketba mapa ka. Ano Ao Senden-i Aoer yimtsüng kaji Ao Senden kübok ta shitetra aser Aoer yimtsüng ajaki pei yimji Ao Senden dak tanglokba süngsang ka dang ta agizüktetra (nibo aji kenyongi magizükteter), Ao Senden-i dang 'aibelensang' er yimten nem pa aridokang ta ozüng agütsür, par yimeri aji inyaker külen tatem nung Ao Senden iba inyakbatemji hau ta agizüktetra, mapa tatem süla.

Kobi melii ano aiben zülutsü nungdak adoktsü asünung tatem nung onük ka ana shia tembangnür.

1. Aoer yimtsüng balala nung inyakyim terara temelenshi alitsü akok saka tongben inyakyimbo kasa dang. Anungji Ao Senden inyakyim ya Customary law aser practices dak ajemdak asü masü, aji jungjunga angatettsüla. Kechiyong aji melaa lirabang parnok inyakyim ya Article 371 A ajanga metentsütsü. Aji mesüra lendong lir aser tarutsü mapang Aoer sobaliba tensa nung tetsübuttsü tatalokba aika tenjitsü!
2. Ao Senden aser Aoer yimtsüng balala tsüngda mapang balala nung mangatettep adokba angur. Iba atalokba shia lenjii arutepa tarutsü mapang inyakyim sademtsü asoshi memunudangsa benteta ayu nung jungla. Ya bentettsü asoshi Ao Senden Federal Assembly mesüra Presidential Council senden nung dang masü saka lenla Mungdang kabosa jatepa Aoer yimtsüng ajak nungi nuboperia sendena arokaroka tebilembatem lemsateper angatettepa ayu nung tajungba asütsü.

Moatemjen, Kohima

E-Mail : emchenmoa@gmail.com

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Faith Theological College (FTC) 8 buba graduation sentong agi



Mongulbarnü Dimapur Town Hall nung FTC 8 buba Graduation sentong nung School Education & SCERT Minister, Yitachu-i takoker nem sempet agütsüba noksa angur

Dimapur, April 18 (TYO): Naga loktiliba nung school züngtor anener aika lir aser iba khuret ya tuluka lir, ta Mongulbarnü School Education & SCERT Minister, Yitachu-i ashi.

"Asen lanur shilem asemü nungi anasübo school züngtor anenertem lir. Secondary jenjang ajangteter kaketshir shilem ka dang süra, kodaser asen loktiliba renloktsü?" ta Yitachu-i asüngdang.

Mongulbarnü Dimapur Town Hall nung Faith Theological College (FTC) 8 buba graduation sentong nung jembidang Yitachu-i ashiba agi, asen state nung education system mejungi kümogo

asera iba ya metongshitsü atema mapa inyaktüsüla.

Nagaland nung Class 2 kaketshir 49,480 tenüng züluoka liasü aser Class 9 nung kaketshir 36,000 liasü. Iba ajanga Class 2 aser Class 9 tsüngda kaketshir 13,480 tashi züngtor anenba sayur, ta paisa metetdaksü.

Maneni Class 10 nung kaketshir 22,214 tenüng züluoka liasü aser ibaji ajanga Class 9 aser 10 tsüngda kaketshir 14,000 züngtor anen, ta School Education Minister-isa shisem.

Nagaland nung kaketshisatsü bushibaren nung inyakyim balala inyakogo. Ajisüaka, tetsükdaksü tulu rongnung kaji Math aser Science tesayur mapa

tanga subject teacher mapa melenba lir. Iba ya ajanga school aika nung Math aser Science tesayurtem mali. Iba ya ajanga asen tarutsü raksatsür. Iba jagi sorkari Math aser Science tesayurtem lezmüksüba mapa ama memelen tashi graduate teachers sota ayutsü telemtetba agiogo, ta Yitachu-isa metetdaksü.

"Nagaland state nung kaketshisatsü bushiba, yimtenren mesüra tamangba yimsü tsütsü süaka ajak nung tebenja lir, kechiyong Naga nungeri mezüngbuba nung Tsüngrem metsübur. Asenoki asen medemer, kibong, yimer, kin aser tangartem sübur saka Tsüngrembo metsübur. Khristan ka ama asenoki mezüng Tsüngrem tsübutüsü aser ibaji inyak nungdang asen loktiliba tejakleni aotsü aser melenshitsu" ta paisa shisem.

Sentong nung Bible Society of India, Dimapur auxiliary secretary, Rev. Dr. ZK Rochill-i laishirtem ayongzüka o jembi, FTC founder principal, Rev. Dr. S Gangte-i 'charge to the graduates' agi.

Faith Theological College (FTC) 8 buba graduation sentong nung laishir 29 graduate asü.

Shingaia Yisu Khrista indang ken matener : Palash Sen



Mumbai, April 18 (Agencies) : India nunger kentener Palash Sen-i Yisu Khrista indang ken ka mejema sayaogo aser pai ashiba agi, nisung shingaia Yisu indang ken matener.

April 16 nü nübertemi Easter Sunday benjung amungdang, Palash-i 'Jesus, the Lord has risen' ken saya. Palash Sen ya Euphoria telok nung kentensang lir.

"Yisu ana nisung ka indang ken shingaia matener. Telok mesüra yimten onük kar atema Pa indang ken matener asütsü akok. Ajisüaka, kentenba aser sangro ajanga tebilemba metetdaksübaji item ajak

madak lir ta ni amanger" ta Palash-i ashi.

"Music aser film industry temi Khrista züdoka toktsür aser iba atema ni kechiba ta bilemer. Tanü-asüng tamangba tenüng nung kentem angashibaji Sufi songs ta ajabatem dang lir" ta paisa shisem.

India nung tang music industry aser kentenerem indang jembidang Palash-i, "tanü industry nung takok anguba kentenertemi tangari mejemba kentem atentsü janjar. Producer aser director temi parnok kanga tajemzük tia nung amshir" ta ashi.

"Sen aika angutsü atema kentenertemi hit song ka atar

asera iba atabaji manener. Nisung shingaia pa mesüra la indang sen endoka ken meyanglur aser iba ya tesasatsüka lir" ta paisa shisem.

'Jesus, the Lord has risen' kenji Palash Sen-i zülu, mejem aser produce asü.

"India nung film aser music industry nung rock ji meputepsü akok aser English oshiji mejangratsü akok, mesüra ken nung Yisu Khrista amshibaji commercial tsütsü majung asütsü akok. Ajisüaka, Euphoria-i ibaji inyaktüsü" ta paisa metetdaksü.

"Onok tennüba agi Yisu indang ken atener" ta Palash-isa shisem.

ANOGO ABEN TSÜNGREM DEN

KIBUBA TSÜBUBA AGI TAKÜM LENI ANIR

Kibuba tsübuba jagi taküm leni anir aser shibai aji aka, tiptema alitsü. Tamajungeri pa mesemdangtsü. A. Shin 19:23

Kibuba tsübubaji temoatsü meimchir ajaki amangbaji nükjiding aser alizüng ka ka yur amangteper, aser alizüngji Kotak aji agiba oner saka teyanglurbo akhüm metsübur. Saka Pa akhümtsübuba ajanga dang takümdakji atongtsü. Kechiaser Kibuba tsübubai taküm (Kotak) leni anir. Iba lenmang nung jajaba ajanga taküm, kibong tiptema alitsü.

Alima nung tiptema kibong, taküm, lokti kwi ali? Kwikati ibaji beshidar? Tiptema melitetba taküm ajanga kibong kangshir aser anisüngzük maka. Azü dokshi rara aika nungi adoker aser yimjung raksatsür. Asen Tsüngrem den tesendaktep junga lira ibaji Tsüngrem akhümtsübutüsü tetenzük.

Apuani, chirnur, kiyonger, yimtsür yimer ajak denji tesendaktep junga yutsüra ibaji asen yimjung. Ibaji Kibuba akhümtsübuba süngjang. Ajak tiptema alitsü aser tamajung kechaia mesemdangtsü. Ibaji taküm Tsüngrem tenangzüka.

Sarasadem:

O Kibuba, ni asr ozü kibong tiptema lia taküm leni arutsü yariangma. Amen.

Nokpu Laishir Telongjem-i pelaba sangdonger

Dimapur, April 18 (TYO): Baptist Arogo deacon board April 16, 2017 nü Longchem aser tenzükertem, ABAM Baptist Arogo nung Rev. Dr. S. Temjen Imchen ordination nung Church advisory board, aser ordination council temi sentong takok tulu ngua agiba sentong takok ngudaktsüba asoshi teyanglur Tsüngrem atema pelaba metetdaksür, ta tenüng asanger, ta Nokpu Laishir Telongjem Tir, Rev. Tenzüker, Rev. Dr. S. Wati Longchar-i sangdong ka nung ashi.

Iba sentong nung kija kibong aser lokti shirnoki aser temjena moajang ta yaritepogo, nenok ajak dang Nokpu Laishir Telongjemi pelaba lemsateper. yaridaktsünür, ta Rev. Wati Tongtipangsa, Longchem Longchar-isa metetdaksü.

Khristan mungdang ka nung Muslim nunger ka prangpong bener adenba video tem ayu



New York, April 18 (Agencies): US kübok Sioux Falls, South Dakota nung ayongzüka agiba Worldview nung ashir.

"Mungdang ayonger jagi pa Weekend mungdang nung Muslim nunger kati prangpong-injang aika bener aden. sentong ayong aser nenok tadenertemi ibaji memetet" ta , adenertemi iba lendong indang Ehab-isa video nung shia lir.

Worldview Weekend ya osang kecha memeteti liasü. Christian radio program ka lir i pa indang Facebook page nung aser 1993 nungi küm shia video aika sayu aser video tem mungdangtem ayongzüka nung pai assault-style rifles, amunger.

pistols aser ammunition bener mungdang nung adenba lir. South Dakota aser

Wisconsin nung April 9 aser April 14 tsüngda amungba series nung Sioux Falls mungdang ya mezüngbuba liasü.

Ehab Jaber indang video tem anguba sülen police nem osang pa indang van gari nunga sangoktsü ta Worldview prangpong-injang aika bena Weekend producer & radio host aliba video nung sayua lir. Brannon Howse-i osangbener

"Nenoki tsübunüra, dang ashi.

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü nai mapa kar nung temolung agüja inyakdang nür medemer nem timtem magütsütsüsa kanga junga shisadanger inyakang.



Taurus
20/4-20/5

Nür medemertemi mapa kar nung takok angutsü mechi sübokrem yimya amshitsü akok. Iba amala maparen ajanga na tarutsü nung lenmang shibangtsü.



Gemini
21/5-20/6

Nai lokti nung jembishinüba mapang tangar temolung meyirutsütsüsa jemiang. Tanü nü temeli azüoka ayutsü merangang.



Cancer
21/6-22/7

Na kinunger den tesendaktep tajung aliba ajanga nü mapa ajunga nung parnok densema shilem agitsüsa akümer. Anungji nai kümdanga inyaksangshiang.



Leo
23/7-22/8

Nai inyakba mapatem aser jembiba o ji nisung aikadi angur. Anungji mangatettep adokdaktsüba maparen nung shilem magitsü merangang.



Virgo
23/8-22/9

Nai mapa kanga jangja aser meranga inyaker. Iba yongji nisung aikati nüdak temolung alemer. Saka nü kisüng ajangzüktsü asoshi sentong meyanglutsüla.



Libra
23/9-22/10

Nai maparen kar nung shilem agitsü asoshi maongka tajung angutsü. Saka na mükemdangra lendongi ayitsü ana nung lir.



Scorpio
23/10-21/11

Mapa tilateri ka ajanga na mela mela aoksar aser iba ajanga na lendongi ayitsü. Anungji akok tashi na süngjema alitsü merangang.



Sagittarius
22/11-21/12

Na shisa taka süaka nü yimya agi tangar temolung yirutsüsa meinyaktsüla. Nü tsüngsü nung nisung aika anidaker ta bilemang.



Capricorn
22/12-19/1

Nü dak nükjidong tajung yur inyakba mapang tangar dak temolung malemtsü akok. Anungji tanü nai mera kümdanga merang.



Aquarius
20/1-18/2

Mapa kar nung nai temolung ajunga agüja tejangraba balaka nung inyakdang timtem ajiurtsü kanga melar. Anungji nai jungjunga shisadanga inyakang.



Pisces
19/2-20/3

Nisung kari nü dak tenük yokdar aser na ashioaktsütsü merangtsü. Anungji na jajaba lenmang tatem nung kechi ajurutsü, itemji nai ken kanga junga shisadangang.

China nung Dangal film ajungketba sentong nung shilem agidar



Beijing, April 18 (Agencies): China nung 3 Idiots, Dhoom 3 aser PK film tem kanga nüngtugusüa nüburtemi sapua reprangba sülen Aamir Khan tang China nung Dangal film ajungketba sentong nung shilem agitar.

'3 Idiots' film China nung talisa kaketshirtem aser tsürapurtemi kanga sapua reprangba sülen PK film-a kanga nüngtugu aküm. Iba film ajanga Yuan million 100 shi

ajangeta liasü. Aamir-i China nung pa film saputsü ta imlaa meliasü. Pai ashiba agi, pa indang film tem Rajkumar Hirani den külemi longjemer inyakba film sayaba sülena ang China nung takok angu. "Linük ana nungi nüngtugu actor tem longjemer film tem nung külemi shilem agiba ajanga linük ana telongjemba akümtsü akok." ta pai ashi.

Chinese version nung adokba Dangal film 'preview'

reprangtsü asoshi Aamir sapur aika sentepa liasü. Nitish Tiwari-i direct asüba film ya China nung taruba ita sayatsü. Arishi küm 51 tain actor-i film ajungketba sentong asoshi Shanghai aser Chengdu semdangtsü. Chinese New Year mapang 'Kung Fu Yoga' aser 'Buddies' box office nung takok anguba sülen, tawa China-i India nunger film asadangtsüba quota 2 nungi 4- i ajungketogo.

Diwali mapang 'Golmaal Again' sayatsü



Mumbai, April 18 (Agencies): 'Golmaal Again' film ya Rohit Shetty-i direct asü aser Diwali mapang iba film sayatsü asoshi film yanglurtemi renema lir.

Shetty den külemi longjemer Reliance Entertainment-i iba film produce asür. Reliance Entertainment, Chief Operating Officer Shibasish Sarkar-i ashiba agi, "Golmaal Again ya India film industry nung kanga dang takok ngua aoba film

rongnung ka lir aser linük nung 'exhibitors' aser 'distributors' iba film kanga yongyaa atadar."

"Parnok takhangba nung 2017 Diwali mapang iba film sayatsü asoshi onoki renemogo. Iba film ya kibongtem külemi aser tanurtem atemaa benjung mapang reprangtsü asoshi tajung asütsü." ta paisa ashi.

Actor Ajay Devgan-i iba film nung maneni Gopal shilem agiba angutsü. Pai film indang official Twitter page nung noksa ka

inokja aliba nung yamai tanaben tweed sütsü: "Golmaal Again taruba diwali nung sayatsü."

'Golmaal Again' ya Golmaal film tem tarensen nung 4buba lir. Iba film ya Rohit Shetty-i direct asü aser maneni iba film nung Tabu, Parineeti Chopra, Arshad Warsi, Shreyas Talpade, Neil Nitin Mukesh, Kunal Kemmu aser Tusshar Kapoor nungeri shilem agir.

Parineeti aser Kunal natia film nung shilem agirtem ajak tangoka aliba noksa inokja aliba nung diwali mapang nung iba film sayatsüba dak sendakba nung tweed süa liasü.

Taoba Golmaal film tem nung Kareena Kapoor Khan, Rimi Sen aser Sharman Joshi nungeria shilem agia liasü.

Iba film Aamir Khan indang film 'Secret Superstar' aser Rajinikath aser Akshay Kumar nati shilem agiba film 2.0 den kasa anogo nung sayatsü.

Kishwer Merchantt, Suyyash Rai-i Snapchat Account Delete asü

April 18, 2017 (Agencies): Snapchat CEO Evan Spiegel-i sensaker lima, India amala nung parnok shishilembaba renloka aotsü atema tejangraba mali, ta ashiba osang prokshiba sülen social media nung opangmapu adoka liasü. Spiegel ashiba olen dak ajemdaker India nunger celebrity tem aikati parnok tebilembatem lemsatepa liasü.

Urvashi Rautela-i Modi indang 'demonetization' maparen atema Spiegel-i

jembiba aitsüa liasü.

Maneni actor Kishwer Merchantt aser kinungbo Suyyash Rai natia Twitter ajanga parnok mepelaba lemsatepa liasü. Dena indang phone nungi iba app delete masü tsüngda tatembang video ka inokja liasü, iba nung Rai-i, iba app amshitsü asoshi onok kanga sensaker südi, ta jangja jangjaa shia lir.

US nung amenloker aliba 'website Variety' ajanga Honibarnü Snapchat nung

taoba mapang mapa inyaka alisang Anthony Pompliano dang Spiegel 2015 küm September ita ashiba olen sangdonga liasü. Iba olen yamai liasü, "Iba app ya takartem atema dang lir. Ni sensaker lima India aser Spain nunger amala nung shishilembaba renloka moner."

Aji saka company-i iba osang aija liasü. Iba osang prokshiba sülen App store nung iba app 'five star' nung züngoker aliba 'one star' jenjangi aluogo.

TAN HOPTA ATEMA - KOMA SÜLA ?

Q Nagaland nung national aser state highways ya PWD-i masü private company - tem nem reprangdaktsü nunga koma süla?

Olong 20 shi nung April 21, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

TRAI ajanga temzüng tasen yanglushitsü

New Delhi, April 18 (Agencies): Telecom indang temzüng aser ozüing tejentem yanglushitsü asoshi Telecom Regulatory Authority of India (TRAI) ajanga 'subgroups' shimogo aser ita 2-3 tashi nung parnoki mapa inyak tenzüksü.

TRAI nung shisa agütsür nisung asem- Sanjeev Banzal (Networks, Spectrum & Licensing), Vinod Kotwal (Financial & Economic Analysis) aser Asit Kadayan (Quality & Services) lir aser par asem-i subgroup kaka anitsü, ta ketdangser kati ashi.

"Iba nukjidong ya tamalen yanglua aliba temzüng tejentem

bushitetsü asoshi lir," ta kasa ketdangseri ashi. Item telok telemsa asem nung ya industry balala nung züngsem densema alitsü aser parnoki temzüng aser ozüing reprangshitsü.

Item telok nung Bharti Airtel, Vodafone India, Reliance Jio, Idea Cellular, Telenor aser Bharat Sanchar Nigam Ltd nungi züngsem atentsü.

Parnok den külemi Cellular Operators' Association of India (COAI), Association of Unified Telecom Service Providers of India (AUSPI) aser ISP Association of India

teloktem nungia züngsem alitsü. "TRAI den industry balala nungi züngsem dena akümba subgroup ajanga item temzüng tejentem ya bushisingdanger melenshitsü," ta TRAI nung mendenbuba, R S Sharma-i taküm küm tetenzüklen shia liasü.

TRAI ajanga 'tariff' tasen yanglutsü, 'next-generation public protection' aser 'disaster relief communication network' asoshi tesem balala nung aliba nüburtem den tongtepratepsü. Parnoki 'national numbering plan' aser 'Universal Service Obligation' senotsü tem reprangshitsü.

Furious 8 ajanga India nung sen crore 71 azükogo



New Delhi, April 18 (Agencies): 'The Fate of the Furious' movie ajanga India nung hopta ka tsüingda nung sen crore 71.06 azüka lir. India nung Hollywood movie rongnung taoba mapang yanglua aliba Furious 7 ajanga otsü yanglua hopta ka tsüingta nung sen aika azüka liasü saka iba otsü yanglushiogo.

Furious 7 movie ya India nung sayu tenzüker hopta ka nung sen crore 70.83 azüka liasü.

F Gary Gray-i direct asüba Furious 8 ya April 12 nung saya aser iba movie ajanga hopta ka tsüingta nung alima ajanga nungi azükba sen ya million \$532.5 ajung aser US kisüing nungia sen million 100.2 azük.

The Fate of the Furious movie nung Vin Diesel (Dom) aser Michelle Rodriguez (Letty) ya tanaben meyiba arur aser Charlize Theron-a adoker.

Hacker temi Multi-Function Printer ajanga miim osang auyatetsü

April 18, 2017 (Agencies): Alima ajanga nung 'cyber security' dak sendakba nung tebilemsü balala adokba nung HP India-i Mongolbarnü tekümsükba maliba 'multi-function' printer tem amshia 'hacker' temi loktitem indang miim osang auyatetsüba lenmang aliba metetdaksü.

Bushisingdanger ka ajanga ashiba agi, company tem shilem 92-i parnok 'security breach' asüba osang agüja liasü. Iba ajanga parnok tenüing menükba den külemi rongsen aika takoksa ngua liasü. Item rongnung shilem 60 bo company network nung Printer timtem adokba

ajanga atalokba nguteta liasü. "Printer nung 'firmware' mapang aben 'upgrade' süa alitsüba kanga tongtibang lir, kechiyong 'upgrade' mesüra iba ajanga 'system code' hack sütetsü. Iba code amshia hacker temi print asüba mapatem aser print asüba computer hack sütetsü," ta Printing Systems, HP India nung Senior Director, Raj Kumar Rishi-i osangbenertem dang ashi.

Sorkar policy guideline tem nung shilem ka ama 'printer security' inoksemtsüji kanga nüngdaker.

"Item tebilemsü dak

rangloker HP-i customer tem nem tekümsükba agütsütsü asoshi technology tasen yanglutsü atema merangdangdar," ta Rishi-isa ashi.

HP-i tangbo 'secure features' "HP Sure Start", "HP Future Smart Firmware", "HP Jet Advantage Secure" aser "Private Print" tem document tem temai adoktsü nungi nokdangtsüba aser nisung mashi mashi-i printer aser printer nung mapa inyakbatem metetsü nungi kümzüksü asoshi agütsür. HP-i maneni 'Managed Print Services' agütsür.



Chandigarh, April 18: Mongulbarnü Chandigarh nung Tecno mobile indang tatong tir, Arif Chowdhury (achichi nungi tanabuba)-i India nung mezüngbuba "Smartest Night" indang "Tecno" phone sayaba mapang tangokba noksa nung angur.

India nung Huawei ajanga sen 7,499 jenjang Honor Bee2 sayaogo

New Delhi, April 18 (Agencies): Huawei company indang Honor ajanga Mongulbarnü India nung sen 7,499 jenjang 'Honor Bee2' smartphone sayaogo.

Iba phone ya hon, temesüing aser tanak sentsü nung angutsü.

"Nisung ajaki alitetsüsa jenjang talang indang phone nung 'features' teperi keter aliba yanglutsüji onok nukjitong lir," ta Huawei India-Consumer Business Group nung tatong tir, P. Sanjeev-i ashi.

Honor Bee2 smartphone

indang display ya 11.43cm FWVGA aser 2100mAh battery lir. Iba smartphone tesülen aliba camera ya 5MP, 1.4um pixes aser dual-LED flash lir aser tejaklen ya 2MP indang camera ka lir.

Iba phone indang processor ya quad-core aser 1GB RAM lir. Honor Bee2 phone nung Android 5.1 Lollipop den Emotion UI 3.1 keta lir.

Iba smartphone indang internal memory ya 8GB lir aser micro-SD ajanga 32GB tashi inoka amshitetsü.

Tesla Gigafactory nung chemical inshe

April 18, 2017 (Agencies): Hombarnü Nevada nung aliba Tesla Inc's Gigafactory battery plant nung lendong aketba chemical inshisa liasü. Iba tatalokba ya 'emergency worker' temi bushisingdangogo aser kanga mejungi yiruba osang kecha mali, ta company-i metetdaksü.

Tesla company nung otongdar, Dave Arnold-i ashiba agi, "Standard construction cleaning solvent" ka 'load' asüandang inshe aser iba ajanga factory aliba ki nung tesem tilaka azüngteta liasü".

"Temang kümzüka kumdangshitsü asoshi idakji

mapa inyaker ana mozüki-i anir ogo," ta Arnold-isa ashi.

Iba tatalokba ajanga mapa inyakba metitemtsü asoshi imlaba paisa shisem.

"Nüburtem atema kecha lendong mali," ta Nevada Storey County, Emergency Management Director, Joe Curtis-i ashi. Paisa ashiba agi, lendong atalokba tesem nung fire department densema liasü aser parnoki iba ya asadangogo.

Sparks, Nevada nung aliba factory ya tang tashi merenem, saka 'Tesla energy storage product' aser taruba Model 3 sedan atema lithium-ion battery cells yanglu tenzüko.

Alima nung SUV gari tekeratiba pongu

April 18, 2017 (Agencies): Mezüing SUV gari yangluba mapang item garitem ya nisung aser oset balala tesem ka nung ka tashi bener aotsü asoshi yanglu. Saka alima melenshia aoba den külemi garia melenshia aor aser tanü asüingbo SUV gari ya akhi mapang ama masü saka nisung anibülem mesüi anisüngzüka amentsü, technology teberi agütsütsü aser lendong balala nung kümzüka alitsü amala oset balala keta yanglur.

Saka gari kati tesem ka atongtsü asoshi iba gari koba tashi kera jajar, iba tetoktepba ya bo tang tashi kasa lir.

Jeep ajanga tawa Grand Cherokee Trackhawk saya aser iba gari ka kera jajatsü asoshi tongtipang süa yanglu.

Alima nung SUV gari tekeratiba pongu yamai alitsü:

Jeep Grand Cherokee Trackhawk

Iba SUV gari ya 6200cc, supercharged V8 engine, 707 hp aser 875 Nm torque lir. Iba gari ajanga second 3.5 nung 0-100km/h tashi jajatsü akoker aser ghonda ka nung kilometre 290 tashi kera jajatsü akoker.

Bentley Bentayga

Iba gari ya 6000cc W12 twin-turbocharged engine lir. Bentley Bentayga gari ajanga hp 608 aser 900 Nm torque agütsüteter. Iba gari tuozük

seret 2440 lir aser second 4 nung 0-100km/h tashi jajatsü akoker. Bentayga gari yagi ghonda ka nung kilometre 301 tashi kera janatsü akoker.

Tesla Model X

Tesla Model X ya Tesla company indang SUV gari mezüngbuba lir aser iba gari nung 100kWh Dual Motor Performance D keta lir. Iba gari nung nisung 7 amentsü akoker aser 967 Nm torque agütsüteter. Iba gari indang tashi ya 603 hp aser second 3.1 nung 0-100km/h tashi jajatsü akoker. Tesla Model X ajanga ghonda ka nung kilometre 250 tashi jajateter.

Porsche Cayenne Turbo S

Iba gari ya 4800cc aser 570hp turbocharged V8 engine lir. Iba gari ajanga second 4.1 nung 0-100km/h tashi jajatsü akoker. Cayenne Turbo s gari ajanga 800 Nm torque agütsür aser ghonda ka nung kilometre 283 tashi jajateter.

Range Rover SV Autobiography Dynamic

Range Rover indang SV Autobiography Dynamic gari nung 550 hp supercharged V8 engine keta lir aser Land Rover gari rongnung iba gari ya tashi taitba lir. Iba gari ajanga 680 Nm torque agütsür aser second 5.4 nung 0-100km/h tashi jajateter. Iba gari ajanga ghonda ka nung kilometre 250 tashi kera jajateter.



Motihari, April 18, 2017 : Mongulbarnü Motihari nung Bihar Chief Minister Nitish Kumar aser Deputy Chief Minister Tejashwi Yadav na Mahatma Gandhi Champaran Satyagrah kum 100 jungmung nung adenba noksa nung angur.

Vijay Mallya London nung pua lir

New Delhi, April 18 (Agencies) : Bank tem nungi sen crore aika apur magütsüba ajanga shishilembar tetsüti Vijay Mallya London nung pua lir aser tanü, Mongulbarnü metropolitan okadak agütsüsü.

India-i nung ochi mashi sen amshisang aser iba dak sendakba nung ozüng aiben agütsür alisang, Wb. Mallya ji UK dang India nem pua agüjang ta February ita nung ashi.

Yi ayoker tetsütisang ya mapang talang ka nungi ozüng küboki anir arutsü inyaka liasü aser tanep 9:30 ako meta pa apuba ya onok asoshi takok tulu ka angur amai lir, ta CBI sangdong ka ajanga metetdaksü.

India-i UK dang Mallya India nem agüjang ta temepeshiba agütsüba taoba ita Secretary of State-i agizüka temelaba agüja liasü.

Taoba hopta Delhi court kati arishi kum 61 tain, Mallya

anema bail agia makoktsü ozüng ka agüja liasü.

Bank temi pai Kingfisher Airlines asoshi apuba sen crore 9,000 shi meyipjang meshitsü merangba ajanga shishilembaba tsütsü kanga dang wangshia alisang, Mallya India toktsür kum ka jungogo New Delhi-i Mallya indang passport-a thitsü aser UK sorkar dang pa India-i meyipa yoktsü ashi.

Ajisüaka mezüngbo Britain ketdangsertemi pa passport meliaka UK nung mungtettsü kechiba süra pa ket nung UK Visa lir, ta shia liasü.

Mallya ya tangar ashioktsüba aser tim masüba mapa inyakba atema CBI-i aitsü aser pai 2009 kum IDBI bank dang sen crore 900 apua aliba anema chargesheet kaket tapak 1000 nung züludena lir.

Iba sen nungjagi tayimtsü indang parts alitsü agütsüba sen crore 250 bo bendangleni belena amshiba CBI-i puteta lir.

Mallya ya India-i pua bener arutsü merangba mapang nungang süng UK den sendaktepa aliba formula one nung pa indang team, Sahara Force India shilem agiba sentongtem nunga nguogo.

Ken o mangadangi pa aitsüba asoshi Mallya-i tawa India sorkar aija tweet kar süa liasü.

Mongulbarnü TV osang ajanga ashiba agi Mallya ji London nung aliba court ka nung nokdaktaksütsü aser iba sülen India nem bendanga agütsüsü.

Tang pa atema bail melaogo, ta osangbenertemi ashi.

India nung aliba okadaktemi pa aiben jaokogo, ajisüaka pai jenshia senzü.

Prevention of Money Laundering Act (PMLA) kübok bushisüngdangdang pai bushisüngdangertem matsüdangi khena danga chitepa maru.

Pa ya March 2, 2016 nü India nungi jena ao.

Swiss bank account miima yua alir nisung ka apu

Dheradun, April 18 (Agencies) : Hombarnü Dehradun chief judicial magistrate (CJM) okadaki yimti nung kanga nungtugu jewellery showroom ka kibur kati pa meyong Swiss bank account ka income tax (I-T) department dang nungi miima

ayuba puteta kum ana tashi tepuokdak ayutsü obendang agütsüogo.

Okadaki Raju Verma dang sen 50,000 senchi achitsü ozünga agütsüogo. Pa indang dokan ji Rajpur Road nung lir.

I-T department-i iba Swiss account nung 2006 kum sen

lakh 92 aliba putetogo. Pai iba sen aliba indang temai adoka memetdaksü, ta okatsürtemi ashi.

Pa ya Income Tax Act 1961 kübok section 276 C (1) (wilful attempts to evade any tax) aser section 277 (false statement in verification) nung aija lir.



New Delhi, April 18, 2017 : Tesüiba mapang DPCC Tir Arvinder Singh Lovely, BJP National Tir Amit Shah lia BJP nung züngsem akümba noksa nung angur.

Class 6 student ka class pur den raratepba sülen soseta asü

Kolkata, April 18 (Agencies) : Kolkata anüolentip tsütsü Behala tesem nung Class 6 nung azünger kaketshir ka parnok class pur ka den raratepba sülen soseta asü, ta Mongulbarnü police-i ashi.

"Jodhpur Park Girls High School nung Class 6 nung azünger arishi kum 11 tain, Srestha Dey ya Hombar anepdang 10:00 ako meta Parnasree, Behala kübok A.K. Paul Road nung aliba lar kidang ceiling fan ka nungi sangzua soseta sür liasü," ta Parnasree Police Station nung ketdangser kati ashi.

Police-i ashiba agi, iba tetsür chanu ya la kija aliba mapang soseta asü. La soseta asüba takdang nungi la kechiba soseta asü iba otsü

zülua aliba shidi ka nguteta lir. Iba anogo nung Srestha jil lar class purtem den rarateper kidangi mepelai aru.

"La kidangi kanga mepelai arua atong aser lai school nung la lar medemertem den rarateper aruba ashi," ta tasüla tetsüi ashi.

"Lai kü den langa lemsatepner ta ashi. Ni takdang tsünglangba nung lua mapa ka inyaka liasü. Lai iba amai inyaksü ni meimla aser tebilema mebilem," ta tetsüi nüktzü atsünger ashi.

La temang sensaa repringdangba sülenang la kechi komaser asü ibaji jangjatsü, ta police-i ashi.

"La kechiba soseta asü ibaji bushisüngdangdar aser tang la temang sensaa repringba osang atar," ta ketdangser jagisa ashi.



New Delhi, April 18, 2017 : Mongulbarnü Canada Defence Minister Harjit Singh Sajjan Union Finance & Defence Minister Arun Jaitly den ajuruteptsü tonga aruba sülen Army ketdangsertemi agizükba noksa yangi angur.

Train menudaktsüba atema merenshitsu

New Delhi, April 18 (Agencies) : Train menuba osang aika angashiba sülen railway minister, Suresh Prabhu-i railway nung inyaker ketdangsertem dang mapang shitak mamshira temerenshi dalang angutsü renema liang, ta metetdaksüogo.

Station tem nung train kechiba menur ibaji asadangtsü aser timtem kar ali nungbo itemji koma asünung ajungtsü itemji inyaksü asoshi tang nungi tenzüka aonung 10:00 nungi anepdang 7:00 ako tashi senior ketdangsertem nem mapa lemezükjang ta Zonal tekolaktem nem osang agütsüogo.

Iba den külemi Prabhu-i, Indian Railways indang official website, national train enquiry system (NTES) nung train jajatsü mapang agüja aliba aser shitakba train apusoba mapa na meputepba indanga dena tuteta shiogo.

Pai ketdangsertem dangi züluba shidi nungji tetsükdaksü nungi jenbuttsü asoshi item ya tekara nung bentettsü shia lir.

April 1 nungi 16, 2017 tashi nung train menuba noklang nung shilem 79 tashi aluogo. Yakumbo iba kasa mapang nung

train menubaji noklang nung shilem 84 liasü. Anungji kodang asadangtepdar taküm noklang nung shilem 4 dak tema agi tajamba akümba angur.

Train menubaji yamai nguteta lir; Eastern Railway (-8.9 per cent), North Eastern Railway (-11 per cent), East Central Railway (-10 per cent), South East Central Railway (-11 per cent), West Central Railway (-8 per cent) aser Konkan Railway (-6.9 per cent).

Varanasi, Mumbai, Sambalpur, Danapur, Samastipur, Jhansi aser Jabalpur densema division 11 nung ano maneni mapang amshitsü nungdaka lir, ta railway minister office nungi züluba shidi nungjisa shia lir.

Kasa shidi nungji pai, tang nungi tenzüka aonung 10:00 ako nungi anepdang 7:00 ako tashi nung ketdangser tejentemi train menuba mesüra mapang shitak nung apusobatem asadanga osang tejangja ayutsüla, ta shia lir.

Item ketdangser tejentem indang tenung aser mobile number tem Punctuality Control Board nem mapang shia metetdaksütsüla, ta shidi nungjisa zülua lir.



Ixtepec, April 18, 2017 : Central America nung migrant temi chemical abenba freight train ka nung mener Ixtepec, Oaxaca state, Mexico nung aliba U.S. arrtsü ajanga yokang ta akhangba noksa nung angur.

Tir aküm nungbo immigration anendaktsütsü:Le Pen

Paris, April 18 (Agencies) : Far-right party lenir Marine Le Pen-i, la tan Tir election nung adoka linük Tir aküm nungbo linük nung ozüing kübok inyakba immigration sentong ajunga anendaktsütsü, ta metetdaksü.

National Front (FN) lenilai, "Ni iba ama matu ama nungzütepba aser mazüoktetba tensa anendaktsüner," ta senden ka nung ashiba Mongulbarnü osangbenertemi metetdaksü.

Paris nung akaba iba senden nung Le Pen-i, "Tang ozüing kübok inyakba immigration tebilemstütem, koba ajanga tekolak kanga menner, iba ya ni anendaktsütsü. Iba mazüoktetba tensa yagi asenok atsüita ayur," ta ashi.

Iba sülen lai, France-i immigration atema tashi tait, tesashi, tagitsü, nüburtem den apet aser ajaki amshitetba ozüingtem yanglua amshitsü nüngdak, ta ashi.

Left-wing sangdong ka

ajanga ashiba agi, la pusemertem tüzaratemdaktsütsü asoshi ibai la nübuyim mapang jembiba o teküprak rongnung ka lir.

Tan France Tir asoshi mezüing round nung tokteptsüpur parnok nisung 11 lir, ta osang ajanga ashi.

Deobarnü mezüingbuba vote agütsütsü anasa polls agitepba aika nung Le Pen aser centrist party nungi Emmanuel Macron na kanga anasatepa toktepba asadangteta lir, ta osangbenertemisa ashi.

Opinion polls ajanga Macron aser Le Pen nati May 7, 2017 nü agitsü aliba tanabuba round tongtettsü amai sayur.

Macron-i mezüingbuba round nung vote noklang nung shilem 24 angutsü, Le Pen-i shilem 23 angutsü, conservative party nungi Francois Fillon-i shilem 19.5 angutsü aser far-left party nungi candidate Jean-Luc

Melenchon-i shilem 18 angutsü, ta Elabe poll ajanga sayur.

Tang tashi nung Macron-i Tir election nung takok angutsü ta ajaki bilemer.

Iba senden nung timtem agütsütsü merangertem aika police den raratep.

Ano Macron-ia Bercy national indoor arena nung pa pusemer nisung 20,000 den o jembia liasü.

"Asenoki tesüiba küm 20 inyaka arubatem nembanga ayutsü, kechiba süra tang asen putui temelenshi aginer," ta pai ashi.

EU tsütsü jembiba mapang pai, "Asenoki Europe nüngdaker, anungji asenoki Europe yanglushitsü. Europe nunger tebilemba ataloktsür Tir ji ni asütsü," ta ashi.

Tang France Tir asoshi tokteper candidate 11 rongnung parnok nisung 10-i asen linük tesüiba mapangi tanaben anir oner, ta paisa ashi.

Malaysia nung N. Korea nunger 296 surrender asü

Kuala Lumpur, April 18 (Agencies) : North Korea nunger parnok nisung 296 tashi par linüki meyipa aotsü asoshi Sarawak, Malaysia nung aliba Immigration Department matsüngdang surrender süogo, ta osangbenertemi metetdaksü.

Mongulbarnü state nung ketdangser tejen kati ashiba agi, N. Korea nunger pass tem joko mapang süir asüba agi Immigration Department

matsüngdang April 11, 2017 nü tashi nung ajak surrender asütsü tetuyuba agütsü.

Pai, Mongulbar tashi nung Immigration Department nung tenüing zülua alir Korea nunger nisung 117 rongnungi parnok 113 surrender süogo, aser anünga aliba parnok pezüji tanüsa surrender asütsü parnok inyakba kiburtemi shiogo, ta ashi.

Item Korea nunger ya tesüiba mapang visa

menüngdakba mapang Malaysia-i arurtem lir aser parnok mapa kiburtemia parnok indang permit agütsütsü asoshi department dangi kodanga maru.

"Mapa kiburtemi joko N. Korea nunger mali ta shiogo. Tang tashi nung parnok nisung 296 surrender süogo, aser parnok ya telok balala küma lemsar par linüki yoktsü" ta ketdangser jagi ashi.

Britain PM Theresa May-i election tekaraba nung aginer

London, April 18 (Agencies) : Britain Ato Kilomser Theresa May-i election tekaraba nung agitsü ayonger.

Lai European Union den pilatsü asoshi olemtep agiba nung la indang Brexit sentong anema opposition teloki tebilemstü bener arutsür ta shia taküm June 8 nung election agitsü ayonger.

"Iba election tekaraba nung agitsüji nia kangabo mulunga masü ka ashir, ajisüaka linük nung yimsüsür tashi tait aser manokshiba nisung shimer Brexit maparen takok ngua inyaka aotsü asoshi iba election kara agitsü ni akang akanga metetdaksür," ta la indang Downing Street office kishi züing nungi ashi.

Yaküm June ita Britain-i BREXIT asütsü mulungtepa vote agütsüba sülen Ato Kilomser asütsü asoshi shimtetla, May-i opinion polls nung kanga junga nguteta lir. Noklang nung shilem 50-i la Ato Kilomser rongnung tajungtila ta vote asü.

Opposition nungi Labour Party nung lenir Jeremy Corbyn-i iba opinion poll nung shilem 14 angu, ta osang ajanga ashi.

Ajisüaka lai ashiba ama election kara agitsü asoshi la den sema parliament nung asemsü lemer anasü indang vote lai angutsüla. Opposition nungi Labour Party-ia parnok iba election asoshi renema lir ta shiogo.



Rungis, April 18, 2017 : France Tir menden asoshi tokteper, candidate Emmanuel Macron-i Paris anüolentip tsütsü chiyungtsü shishilembaba tesem, Rungis wholesale nung shi ayokba tesem ka semdangba noksa nung angur.

Australia-i bendanger atema visa sentong anener

Melbourne, April 18 (Agencies) : Tanü Mongulbarnü Australia-i visa sentong ka teti asoshi anenogo. Iba visa ya bendanglen nungi Australia nung arua mapa inyakertem nem khen asoshi agütsüba visa lir.

Iba visa ya timba ka India nungeri amshir aser Australia nung mapa mangurtem nem maongka agütsütsü asoshi parnoki iba visa shibang.

457 visa ta ajaba visa sentong ya ajanga Australia nunger temsüa maliba, shishilemba mapa nung bendangertem nem küm pezü tashi mapa inyaktsü maongka agütsür.

"Onok ya immigration linük ka lir, ajisüaka linük nung mapa inyaktsü asoshi mezüingbuba Australia nunger nem maongka agütsütsü, anungji khen asoshi bendanger arua mapa inyaktsü asoshi agütsüba, 457 visa onoki shibanga ayur," ta Ato Kilomser Malcolm Turnbull-i ashi.

Iba visa alirji timba ka India nunger lir aser parnok sülen UK aser China nungertem lir.

"Onoki joko mapa inyakertem nem 457 visa magütsütsü aser ibaji Australia nunger asoshi maongka ka

asütsü," ta pai ashi.

Pai, "Australia nunger mezüing ta ser sentong ka tenzüksü. Yaküm September 30 tashi nung 457 visa sentong kübok mapa inyakertem nisung 95,757 liasü," ta ashiba osangbenertemi metetdaksü.

Iba visa sentong ya ano inyakim balaka agi melenshitsu aser iba nungji telatetba kar dena alitsü.

"Mapa tongtibangtem nungbo mongintemji nüngdaksübasana anungji 457 visa meleno ano khen asoshi agütsüba visa inyakim tasen ka lapoktsü aser linük ajungtsü mechi nung item visa ji kangsa takoktet nisungtem nem dang agütsütsü," ta Turnbull-i ashi.

Turnbull-i, sentong tasenbaji ajanga bendanglen nungi mongintemang anir arutsü kechiba süra mapa kibur kati Australia nunger tasüpoka bushiba dang nungibo bendangerang ka melamela anir arur, ta ashi.

Iba temelenshi ya Turnbull-i India semdanga linük security, kiralongra tebilemstü, shisaluyim aser tashi tsütsü olemtep kar külen tenangzüka trok nung sign sütepba sülen sangdong.



Seoul, April 18, 2017 : April 17, 2017 nü Seoul, South Korea nungi party tulutiba, Minjoo Party nungi linük Tir asoshi tokteper candidate, Moon Jae-in election nübuyim sentong ka nung shilem agiba noksa nung angur. May 9, 2017 nü agitsü aliba Tir election nung tokteper Candidate temi parnok official nübuyim sentongtem Hombarnü nungi tenzüko.

Kohima DPDB April ita atema senden amen



April 18, 2017 nü Kohima DPDB senden nung Er. P Jakpou Khamniungan PRE, EE (Rural) Kohima-i department indang osang metetdaksü dang agiba noksa angur.

Dimapur, April 18 (Agencies): Kohima District Planning & Development Board April ita atema April 18, 2017 nü DPDB Hall, Kohima nung senden menogo.

Iba senden ya ADC HQ Lithrongla Tongpi lenisüba kübok amen. Taoba senden minutes nung 'attendance report' reprangshidang ADC-i züngsemtem dang senden nung medentettsüsa kümra DPDB Chairman mesüra Vice-chairman nem tezüluba nung metetdaksütsü asoshi lephsia ashiba den külemi iba telatetba nung manidakteter nem temerenshi agütsütsü asoshi board-i ketdangsertem nem tezüluba nung metetdaksütsü.

Laisa maneni züngsemtem dang parnok department profile ADC Planning nem LADP booklet atema agütsütsü asoshi metetdaksü.

Village aser Ward Adoption Committee dak sendakba nung ADC-i tesentepertem dang ashiba agi, committee Adopt asütsüba sentong Kohima DPDB-i achaayangbaji Central Ministry-i agizükogo aser Prime Minister award atema shimogo.

Iba kasaji 'coffee table' kakat ka nung inoksemtsü koba April 21 nü vice-chancellor of India-i sayatsü. Lai maneni Convener tem dang parnok mapa December tashi nungbo tembangtsü asoshi mepishi.

Vice-Chairman DPDB & ADC Planning, Ketoho Luho-i village aser ward Adoption committee indang tebilemba aser report züngsemtem nem agütsüba liasü. Pai ano adoption of villages aser ward guideline booklet alem.

Board-i Peraciezie colony, high school ward nung electrical yindong talila ka inoktsü asoshi lemteba liasü.

Senden nung item loktitem sorkar den maneni züngsemshitsüba aser tasen züngsemtsüba atema benoka liasü. Loktitem yamai alitsü:

1. Guardian Foundation Society, New market colony, Kohima
2. Little Angels society, near DPHSS Kohima village
3. Formation Society, Lower Bayavu Colony kohima
4. Asia Harvest Alliance society, upper Chandmari Kohima.

AEO Kohima, R. Mhathung-i state electotal-roll nung nisung mali sünnung tenüng zülüokba indang metetdaksüba den külemi iba dak sendakba nung ACAUT Nagaland nungi Department dangi shidi züluba agizükba metetdaksü.

ACAUT Nagaland-i parnok

R. Mhathung-isa senden adenertem dang pei department nung tenüng tanaben zülüokshiba ya Peoples Act kübok melaa mali ta tekümdangtsü agütsütsü asoshi mepishia metetdaksü. Paisa pei department nung aliba staff tem nem iba dak sendakba nung tangazükba agütsütsü asoshi shisem.

Er. P.Jakpou Khamniungan PHE, EE (Rural)-i Kohima nung tzü belenshiba dak sendakba nung power point presentation ka sayua liasü.

ADC-i Kohima College Principal dang par college indang inyakyim taruba DPDB senden nung metetdaksü atema mapa lemzütsü.

UNITED NAGA TRIBES ASSOCIATION ON BORDER AREAS

PUBLIC MEETING

Hosted by Tuli Area Joint Council Forum (TAJCF)

Community Hall, Tzudikong Date: 21/04/17 Time: 10:30 AM

Chairman: Imsumongba Pongen, General Secretary, UNTABA

Sessional Secretary: Adv. Ruchyahan Koppen, Jr. Secy, UNTABA

- Invocation : Rev. Temshi, Pastor Baptist Church, Tzudikong
- Welcome Address : O. Benjong Jamir, President, TAJCF
- Short Speeches : 1. N. Jacob Zhimomi, Hon'ble Paril. Secretary, Irrigation & Flood Control, Govt. of Nagaland
4 Ghapani IAC
- 2. Amanba Yaden, Hon'ble Paril. Secretary Industries & Commerce, Govt. of Nagaland
21 Tuli AC
- 3. Advisory Board Members

- Keynote Address : Hukavi T. Yeputhomi, Chairman
- General Discussion Hour :
- Adoption of Resolution :
- Benediction :
- Lunch :

INVITE

The UNTABA invite all the People's Representatives (MLAs) of all border Constituencies of Nagaland, the Government Machineries of Civil and Police Administrations of all border Districts, all the Border Magistrates, the Official representatives of Naga Tribes Hobos, the Official members of all the frontal organization of Nagaland, the Village Council members and GBs from all the border areas, the Advisory Board, the Executive Committee and the Action Committee Members of the UNTABA to make it convenient to attend positively with valuable inputs.

Office of the

MEDZIPHEMA VILLAGE COUNCIL

Dist - Dimapur : Nagaland - 797106

To Whom It May Concern

With reference to the press statement dated Saturday the 25th of March 2017 under "MVC alleges embezzlement in MGNREG Funds" that appeared in the daily newspaper this is to clarify that all the matters and issues relating with the Department of Rural Development has been clarified by the Department and the issue has been resolved and settled amicably.

Therefore, it is our earnest request to various individuals and organisations not to misinterpret the Press Statement made by the Medziphema Village Council and that any individuals or Organisations should henceforth not take up the issue relating to the village matters and the Department which has already been resolved as mentioned.

1) Neikhonyü Kuotsu Chairman, MVC Ph : 8974270619 <i>[Signature]</i>	3) Pelesevi R. Kuotsu GB <i>[Signature]</i>
2) Khriengulie Kapo Secretary, MVC <i>[Signature]</i>	4) Thihelie Nakhro GB <i>[Signature]</i>
	5) Vizohieu Khro VDB Secy. <i>[Signature]</i>

TEMEIM OJALA

MRS. TAKOKALA (AKHOYA)

SÜR KÜM KA AJUNGBA ANOGO



Temeim oja, na akümüli wadang tembanger tanü (19th April 2017) küm ka abensadang, nü tamang sarasadem ola, sayu longkong mapatem aser nü taremsük shisatsütem onoki menungra bilemteter. Nü tsüngsü nung onok ajaki jajatsü Yisui yariangma.
Temeim Chirnur, Semchirtem aser Kinüngertem.

Office of the

Mangmetong Senso Telongjem

Mokokchung: Nagaland

KONANG TETUSHI AGÜTSÜR

Wt. S. Arenla Longkümer, Principal Fazl Ali College Mokokchung, W/o C. Tamsü Imchen (Mangmetong) nü wadang aser tenzükba alang tanü temaba jenjang ngutetba asoshi Mangmetong Senso ajaki konang tetushi agüsür. Asen Teyanglur Tsüngremi nü taküm, kibong aser wadang ano temaba nung ajungketa moajangma ta sarasademtsür.

Sd/- Senso Wadang nung; Sd/-

T. Sosang Imchen A.Moa imchen

President, MST, Mokokchung G/Secy. MST, Mokokchung

Office Of The

Ongpangkong Arogo Tenzüker Telongjem

Mokokchung: Nagaland

Nükjidong: "Arogo Aser Nübur Asoshi"

SANGDONGER

Ao Baptist Arogo Mungdang (ABAM) nung tenzüker shimyim koba timtem ajanga Chuchuyimpang Arogo aser Yimten ABAM nungi atsünga liasü, Ongpangkong Arogo Tenzüker Telongjem (OATT) ajanga telok anaprong den tongtepratepa yimjung apu latsüba yong, tangatettep tajungi arua akhi ama kecha ken o makai amalitepa aotsü iba osang ajanga sangdonger.

Sd/- Sd/-

Dr. R. Zulu Jamir Mr. Wapang Longchar

President, OATT Secretary, OATT




SANGDONGER

An techanu Broiler temesüngba aser Kroiler techanu tanak aser temerem (colour) bener arua lir. Nübur shirnoki aliner 20th to 22nd April 2017 tashi nung Mokokchung Police Point anasa aliba dokan Hospital road nung angutsü.

Tongtepratepdak: 9856504928 / 9856770034.

Mozüyong Ward, Tzüdikong Town

Pelaba Lemsateper

Onok Mozüyong Wardsanger lenmang inyakkang kija aser kibong shirnokisa rongsen aser materials agütsü yaritepogo, nenok tenla tulu asoshi kanga pelaba lemsateper. Tsüngremi nenok ajak moajangma.

Tenla agütsürtem :

1) Meren Imchen, Executive Engineer (PWD) Tuli 2) P. Meren Jr., 1st Class contractor, Tzüdikong 3) Arepsangba, Tuli 4) Tamsuwati, Tzüdikong 5) Mozüyong Lanur Telongjem, Tzüdikong	6) Meranglar Telok (Tzüdikong), Mozüyong Ward 7) I. Meren Ldr., Tzüdikong 8) Enam, Halwating 9) Lijong Stone Crusher, Tzüdikong 10) Chahangir Alam, Tzüdikong 11) Mahamudin Ali, Tzüdikong
--	---

Sd/- Sd/-

Imtiluen Sungit Ldr

President, MWT Gen. Secy., MWT

5buba Frolic Football Cup tenzükogo



Dimapur, April 18 (Agencies): 5buba Frolic Football Cup Medziphema Local Ground nung tenzükogo. Iba asayamung nung team 39-i shilem agitsü. Asayamung tetenzükba sentong 5 Ghaspani II A/C MLA, Zhaleo Rio tongti tesemdanger liasü aser Medziphema, ADV Sara S. Jamir tetushi tesemdanger liasü.

Sentong nung o jembidang Rio-i Dr. T.Ao, Baichung Bhutia aser Sunil Chetri nungertatishitsü amshia jembi. Pai lanurtem dang parnok nungtugu asayar tajung akümtsü nükjidong ayuba nung masetshi-i meranga inyaksü asoshi

ajungshi. "Tangar-i ajangetra Naga nungertemia inyaktetsü, talisa Medziphema sub-division amala football kanga sapuba tesem nungi adoktsü. Aji süaka temaba jenjang tongtetsü asoshi bendanga agüja meranga inyaksüla," ta shia pai maneni ajungshi.

Pai Assam nungi asayamung nung shilem agitsü aruba team ka alakteta pelaa agizük aser sentong ayonger; Frolic Club-i lanurtem atema football asayatsü atema sabang tajung lapoktsüba atema tenüngsanga agütsü.

Tongti tesemdanger-i 5buba Frolic Cup lapoktsüba sülen anogo tepiyong nung asaya 6

asayaa liasü. Mezüngbuba asaya nung Tsiapama Village Youth Organisation-i Excelsior Club 7-0 agi akok. Tanabuba asaya nung KYC 'B'-i Gunners 4-0 agi koka liasü. Tasembuba asaya nung MVYO-i 4-1 agi United Falcon madak takok angu.

Asüng asaya yamai alitsü:
1. Peduzha FC vs TBCM BKK 7:00AM
2. Sirhima Youth & Students' Union vs Khanglai FC 8:30 AMc
3. Milcom FC vs Hekheshe FC 2:00 PM
4. Yiese FC, Dimapur, vs Khanakhurü Students' Union 3:30 PM

Mridul Banerjee East Bengal coach shimogo



Kolkata, April 18 (Agencies): Trevor Morgan coach menden nungi aluba sülen ghonda 12 tsüngda nung Mridul Banerjee East Bengal coach asütsü shimogo.

AFC-A license bener alisang ya taoba Goan manager

Armando Colaco madak shima liasü.

"Onoki Mridul sapur aser pa coach asütsü asoshi shimogo. Pa nem Federation Cup tashi contract agütsüogo," ta East Bengal General Secretary Kalyan Majumdar-i ashi.

Arishi küm 56 tain coach yagi tawa Bengal team coach süa Santosh Trophy National Football Championship Goa nung asayadang Goa koka liasü. Bengali tang tashi nung iba asayamung 32 ben kokogo.

East Bengal I-League table nung points 27 nguteta Aizawl FC aser Mohun Bagan na sülen tasembuba jenjang nung lir.

East Bengal I-League

akoktsüba timla April 16 nü DSK Shivajians den 0-1 agi tamakok anguba sülen samaadok.

East Bengal pur tarensena tamakok anguba Churchill Brothers den tenzükba Chennai City FC-a mekoki liasü.

Taoba hopta tamakok anguba sülen parnok sapurtemi Morgan coach menden nungi anendaktsütsü asoshi khanga liasü.

Club-i Morgan nem Federation Cup tashibo mapa inyaksü asoshi maongka agütsü saka pa mapa nungi anentsü asoshi temelaba meshiba shidi football secretary Santosh Bhattacharya nem agütsü.

vivo APRIL 19, 2017 ASAYA
Sunrisers Hyderabad VS Delhi Daredevils
Hyderabad 8:00 PM

IPL 2017 APRIL 18, 2017 ASAYA OSANG
RCB-i run 21 agi Gujarat akok

Nagaland Downhill Championship alitsü

Mokokchung, April 18 (TYO): Downhill (DH) benjongmung tajungba nung metettsü.

'mountain bike racing' ya alima nung 'cycling' tetoktepba balala rongnung kanga jangratemtsü aketba ka lir aser iba tetoktepba nung cycle anir sempet aser temang shitak alitsü nungdaker.

Nagaland Downhill Championship nung ya Nagaland ajunga nung tejangrartem sendena tetoktepba alitsü aser takoker nem "Fastest Naga" nungja agütsütsü. Iba tetoktepba ya longren-longpang amala senzusempongtsü tasak tesemtem nung alir.

Nagaland Mountain Biking otsü nung ibai mezüngbuba alitsü aser tetokteperitem ajungshitsü asoshi iba tetoktepba nung shilem agirtem nem parnoki shilem agiba repranger jenjang (rank) agütsütsü.

Iba tetoktepba sentong ya Ao-Naga kin benjong tulutiba, MOATSÜ-MONG nung agitsü aser iba sentong ajanga benjong tali metettsü. Iba sentong nung shilem agitsübur temi cycle nung asemtepba kisüng masü saka iba Moatsü

Nüngdakbatem:

1. Personal Mountain Bike (Tetokteper tsüngda nung bike melentepa amshitsü memelatsü).

2. Compulsory Full Face Helmet aser gloves.

3. Iba tetoktepba nung shilem agitsüpurtemi May 1 nung sen 1000 agi tenüng zülüoktsü.

DH lenmang yamai alitsü: Tesem - Chuchuyimpang Village

Lenmang tasazük - Kilometre 2 (Downhill)

Lenmang temettsü - Lenmang shilem 90 bo 'Single Track' den 'drops', 'jumps' aser 'steep' dang alitsü.

Tejanrar temi Facebook page - Trail Hounds Cycling Club mesüra Participants Relation Officer Mr.

Wapangsunep den

+918257062268 ajanga

tongtepratepa tenüng zülüoktsü

akoktsü, ta Trail Hounds

Cycling Club tir, Atoba

Longkumer aser tongti zülur,

Tzudiyong Jamir nati sangdong

ka nung metetdaksü.

Manipur NH 37 nung... (Tapak 1 nungi...)

Sorkari Naga nung litsü nung sepaitem lemzükbaji ANSAM aser tanga Naga teloktemi anema nokdaker.

United Naga Council (UNC)-i ita pezü dak tema Manipur nung highway ana mokdanga liasü.

Naga nung litsü nung district tasen tenet tentetba anema UNC-i highway tem mokdanga

liasü.

Tanü Chief Minister N. Biren Singh-i par cabinet züngsemtem den tensa indang osang metetpelatepa liasü.

Osang angazükba agi,

highway tem nung sepaitem

talila mapa lemzüksütsü aser

kobi melii IRB personnel aser

police commando tem mapa

lemzüksü akok.

ABAM Clean Election... (Tapak 1 nungi...)

Sentong nung olemsatep mapang agidang, joko sen amshir agent tem mesüra shibai sen meshir, temzüng nung aketba ama putetra tepuokdaki yoktsüla aji mesüra anosa yamai aotsü südi ta tesasa o jembia liasü.

Tanü tashi sen amshir ka dak danga temerenshi agütsüba malinung yamai aoer asü ta sensaksema liasü.

Sensaksem nungsa, candidate tem nem open speech agütsüdakja ano pa/la profile tejanga lokti nem metetdaksütsü aser memetetba

lokti nem election mapang sen agüja lokti amokmerena nisung ka temeden mamshidaktsüba ya joko meshimeshia taruba election nungibo samadaktsütsü tebilembatem lemsatep.

Aruya aliba election nungbo joko sen amshir nokdanga

Yimten aser Arogo tsüngda

telongjem tajung nung

angatepeta election merükteta

agitsü jembi.

Maneni lokti ajaki iba mapa

nung ABAM den yariteptsü

nükla tulu ayur, ta Executive

Secretary, ABAM-i sangdong

nungsa metetdaksü.

One Solution
A Product of UYUJI Group

Oajm

5 Problems

FAST RELIEF FROM PAIN

Manufactured by: Medixim Research Health Products Pvt. Ltd; Thane (Maharashtra). CUSTOMER CARE:- 0230-2393427

BILEMDANGANG

"Nü tejak anü tsütsü shira nai tanüla mangutsü."